

بِسْمِ اللَّهِ الرَّحْمَنِ الرَّحِيمِ

Khutba Jummah

HAZRAT MUHYI-UD-DIN AL-KHALIFATULLAH

Munir Ahmad Azim

25 Mars 2016 ~
(15 Jamad'ul Aakhir 1437 Hijri)

(Résumé Khutba)

Après ki li fine salué tous so bane disciples (et tous bane musulmans) entier le monde avec la salutation de paix dans l'Islam, Hazrat Muhyi-ud-Din (atba) fine lire Tashahhud, Ta'uz, Surah Al Fatiha, et li fine ensuite axé so Khutba Jummah lors « *Khatam-an-Nabiyyine et La Venue de Bane Prophètes* »:

KHATAM-AN-NABIYYINE ET LA VENUE DE BANE PROPHÈTES

Vu bane débats ki ena entre bane Musulmans Ahmadi et bane Musulmans Salafi ainsi ki avec bane les autres groupes musulmans, mo fine décidé aujourd'hui pou consacrer mo Khutba Jummah lors le sujet de *Nabuwwah* (rang de prophète) et le statut du Saint Prophète Muhammad (saws) comme le « *Khatam-an-Nabiyyine* ».

Pareil couma le Messie Promis du siècle passé Hazrat Mirza Ghulam Ahmad (as), bane révélations divines ki mo fine gagne faveur pou recevoir contenir bane mots *Nabi* et *Rassool*, non pas ene fois mais plusieurs fois. Messenger capave veut dire aussi prophète. Plusieurs fois mo Bien-aimé Créateur (Allah (tw)) fine même adresse moi comme *Rassool*. Toutefois, si nous considère ki le Saint Prophète Muhammad en étant le sceau de bane prophètes, ki alors aucaine prophète pas pou capave vine dans sa le monde là après li, mo pou dire ki naturellement aucaine prophète ki li ancien ou nouveau pas pou capave vini, dans le sens ki mo bane adversaires et ainsi ki bane adversaires du Messie Promis (as) paraîte croire (kot zot, zot croire ki tous types de bane prophètes d'Allah pas pou capave vini afaire, pas même bane prophètes ki vini dans l'image de l'Islam et de bane l'enseignements de Nabi Kareem Muhammad (saws) mais par contre zot croire ki ene ancien prophète pou vini après Hazrat

Muhammad (saws)); parski en tout les cas, en toute vérité, saki zot pensé là pas bon parski zot même zot ene paradoxe, kot d'ene côté zot pé calomnié et traite de *Kufr* bane prophètes de l'Ummah de Hazrat Muhammad (saws) tandi ki ironiquement zot pé attane la venue d'ene prophète ki sorti depuis ene ancien Ummah pou faire revivre l'Ummah parfait de Hazrat Muhammad (saws).

Zot pé attane le retour de Jésus Christ – Isa (as) ; c'est-à-dire, en d'autres mots, zot croire dans la continuité de l'apostola de Hazrat Isa (as) et dans bane révélations divines ki li fine recevoir pendant ene période de quarante ans, ene telle période ki plus longue ki celui ki le Saint Prophète (saws) fine jouir, et de ce fait, ene telle croyance pareille li manifestement dans l'erreur parski sa verset Quran Shareef là rezette sa :

« ... Li nek ene Messenger d'Allah et le Sceau de bane prophètes » (Al-Ahzab 33 : 41)

Et aussi par la tradition suivante : **« ... La Nabi Ba'adi »** (péna aucaine prophète après moi). Et mo entièrement d'accord avec saki le Quran Shareef dire.

Sa verset Quran ki mo fine dire là renferme ene très grand prophétie ki fine échappe à l'attention de mo bane adversaires. Sa veut dire ki après la mort du Saint Prophète (saws) aucaine membre d'aucaine religion autre ki l'Islam pas pou recevoir le don de l'apostola et ki aucaine dimoune, hindou, juif, chrétien ou soi-disant musulman pas pou capave qualifié zot comme *Nabi*.

Seul approche à sa position élevée là c'est le chemin de bane Siddiques ou de bane ki perdi zot-même dans l'amour du Saint Prophète (saws). Celui ki prend sa chemin là pou capave gagne le privilège pour porte comme *« Zill »*, le manteau de l'apostola, c'est-à-dire, ki en étant ene reproduction parfait de l'image spirituelle du Saint Prophète Muhammad (saws), et kot sa dimoune là li content Hazrat Muhammad (saws) d'ene l'amour sincère, alors li capave aussi gagne le privilège pour porte le manteau de prophète du Saint Prophète Muhammad (saws). Ene dimoune ki pé proclamé ki li ene Messenger d'Allah, ene prophète d'Allah dans sa catégorie ki mo fine mentionné là li pas pou capave vine ene rival du Saint Prophète Muhammad (saws) parski sa récipiendaire et prétendant à l'apostola là pé obtenir tous so bane la forces et so bane faveurs **en passant par li (par Hazrat Muhammad (saws))** ; et donc la position spirituelle ki li atteindre **c'est nek pour la glorification du Saint Prophète Muhammad (saws)**.

D'ailleurs le Saint Prophète Muhammad (saws) li connu dans léciel couma Muhammad et Ahmad en même temps. De ce fait zamais ene l'autre kikaine pou capave dépasse la grandeur du Saint Prophète Muhammad (saws), et alors sa dimoune ki vini couma so *Zill* (reflé) là ena envers Hazrat Muhammad (saws) ene dette de reconnaissance, parski sans Hazrat Muhammad (saws), zamais li pas ti pou capave accède au stage de prophète.

Le verset suivant du Quran Shareef: « **Muhammad li pas papa d'aucaine parmi zot bane z'hommes, mais li nek ene Messenger d'Allah et le Sceau de bane prophètes** » capave interprété comme suite: Muhammad (saws) li pas papa (biologique) d'aucaine bane z'hommes de sa le monde là, mais li papa (spirituel) de bane dimounes de l'autre monde parski li seul prophète ki so bane faveurs divines pou reste vivants jusqu'au jour du jugement dernier et bane récompenses et faveurs de so l'apostola pou étendre lors so Ummah, dans sa le monde là et dans l'autre lémonde (*Aakhérat*). Li aussi le seul prophète ki tous bane les autres prophètes ki li passé et futur, zot tous attaché avec li. Si bane prophètes d'avant so venue fine vine dans sa le monde là, c'est bien pour ouvert le chemin de so venue, pour prévenir le monde et annonce la bonne nouvelle de la venue de sa bien-aimé d'Allah là. Et bien sûr aucaine prophète pas le sceau de bane prophètes sauf li. De ce fait, **bizin impérativement passe par so l'intermédiaire pour recevoir bane faveurs de l'apostola (de Nabuwwat)**.

Mo dire zot, ni moi ni Hazrat Mirza Ghulam Ahmad (as) nous pas bane prophètes indépendant parski nous attaché avec *Nabuwwah* du Sceau de bane prophètes, et dans sa siècle là mo fine vini comme le *Khalifatullah* (le Calife d'Allah) et le *Muhyiuddin* (Revivificateur de la religion) de sa siècle là. Allah fine donne moi sa bane titres et rangs spirituels là parski mo fine plonge mo l'être entièrement dans celui du Saint Prophète (saws) et c'est de sa façon là ki la phrase « Sceau de bane prophètes » retenir tout so signification. La venue d'ene prophète indépendant comme celui de Jésus Christ pou sûrement change sa signification là.

Malheureusement, bizin dire, bane musulmans aujourd'hui ki dire ki zot content le Saint Prophète Muhammad (saws) de tout zot l'êtres zot pas sincères dans saki zot dire parski zot donne l'honneur plisse à ene prophète israélite au lieu honore le plus grand de tous bane prophètes, le Saint Prophète Muhammad (saws) et au lieu démontrer so supériorité vis-à-vis de bane les autres prophètes porteurs de loi ki fine vini avant li. L'histoire se répète, parski durant vivant de Jésus (as), bane Juifs ti pé attane le retour physique d'Elie (as) depuis les ciels, mais ki Jésus (as) fine dire zot? Li fine fer zot compran ki Elie zamais pas pou dessane physiquement du ciel pou sappe zot, et ki en fait le prophète Jean-Baptiste (Yahya) fine vini comme la deuxième venue d'Elie. Li ti so double (réflé) spirituel.

Maziné ki le mot *Nabi* (prophète) signifie littéralement, celui qui faire bane annonces lors l'inconnu en puizan so connaissance depuis la source divine. Là, kot sa signification tenir deboute, sa dimoune ki dire ki li fine vini là et ki pé fer ene proclamation, alors li pou capave être appelé *Nabi* ou prophète, et ene *Nabi* li nécessairement ene *Rassool* (Messenger d'Allah), parski autrement li pas ti pou capave puize so connaissance de l'Inconnu à la source divine, parski sa verset là dire :

« Allah pas révèle So bane secrets excepté à celui qu'Il a choisi pour vine So Messenger. » (Al-Jinn 72 : 27-28)

En croyant ki aucaine prophète dans le sens d'ene dimoune qui prédire l'avenir pas pou capave vini après la mort du Saint Prophète (saws) nous ti pou penser ki bane musulmans ti pou complètement trouve zot sans le don de la révélation et de la communion divine parski, d'après verset ki mo ti cité, Allah (swt) pas révèle So bane secrets excepté à So bane Messagers. De même celui ki ene Messenger d'Allah li ene *Rassool*.

La différence entre sa deux positions là c'est ki aucaine prophète ou *Nabi* porteur de loi zamais pou capave vini dans le monde jusqu'à la fin des temps après la mort du Saint Prophète (saws), tandi ki nous pou capave gagne bane prophètes ki fine plonge zot êtres dans celui du Saint Prophète (saws) et zot pou connu dans lé ciel comme bane choisis d'Allah. Celui qui prétendre ki li ene prophète et li pas rempli sa condition là li ene imposteur. La phrase « *Sceau de bane prophètes* » exige ene identification complète entre l'être d'ene prétendant et celui du Saint Prophète (saws) : la moindre trace de distinction brise sa sceau là. Ainsi celui ki fine capave opère sa identification complète là en reflétant complètement tous bane vertus du Saint Prophète (saws) couma ene miroir bien clair, alors li pou capave gagne le titre de *Nabi* (prophète) sans ki li casse le sceau de bane prophètes, parski li le réflé parfait du Saint Prophète (saws).

La dignité ki ene dimoune (z'homme) pareil gagner li pas froisse celui du Saint Prophète (saws) comme le Sceau de bane prophètes parski ki li anéanti tout so l'être complètement et sa dimoune là li même connu sous le nom de Muhammad.

Ki Allah aide le monde musulman pou reconnaître la véracité de Hazrat Mirza Ghulam Ahmad (as) et sa humble serviteur d'Allah de sa siècle là parski nous pas fine vini pour abolir le sceau de *Nabuwwat* mais bien pour prouve la valeur et la gloire exceptionnelle du Saint Prophète Hazrat Muhammad (saws). Nous nek so bane suivants obéissants et nous lumière nous recevoir li à travers la lumière de sa Messenger exceptionnel là par la grâce infini d'Allah. La vérité fine vine à zot Ô bane musulmans afin ki l'islam, nous l'ISLAM regagne la vie et ki personne pas capave piétine so bane l'enseignements nobles. Ki Allah aide nous dans sa travail très important là, parski l'islam trouve li dans ene l'état critique et c'est à nous pou relève li par l'aide puissante d'Allah. *Insha-Allah, Ameen*.